

Na osnovu člana 9. Zakona o gradu Tuzla („Službene novine Federacije Bosne i Hercegovine“, 80/14) i u skladu sa Odlukom o proglašenju Grada Tuzle („Službeni glasnik Općine Tuzla“, broj 01/07) Gradsko vijeće Tuzle na svojoj prvoj (konstituirajućoj) sjednici održanoj dana 30. oktobra 2014. godine, d o n o s i:

## **STATUTARNU ODLUKU o organizaciji Grada Tuzle u skladu sa Zakonom o Gradu Tuzla**

### **I OPŠTE ODREDBE**

#### **Član 1.**

Ovom Odlukom se privremeno u skladu sa Zakonom o gradu Tuzla (u daljem tekstu: Zakon) do donošenja Statuta grada Tuzle utvrđuju gradski organi, način njihovog rada i druga pitanja od značaja za organizaciju, status i obilježja grada Tuzle .

#### **Član 2.**

Grad Tuzla obuhvata područje dosadašnje Općine Tuzla utvrđeno Zakonom o područjima opština u SRBiH („Sl.list SR BiH“, broj 47/62, 6/65 i 35/77) i Zakonom o utvrđivanju naseljenih mjesta i o izmjenama u nazivima naseljenih mjesta u određenim općinama – Prečišćeni tekst („Sl.list SR BiH“, broj 24/86, 33/90 i 32/91) i („Sl.novine Federacije BiH“, broj 14/04, 59/05 i 68/05).

#### **Član 3.**

Grad ima svojstvo pravnog lica.  
Sjedište Grada je u Tuzli, Ulica ZAVNOBIH-a, broj 11.

#### **Član 4.**

Grad preuzima zastavu, amblen i druga obilježja Općine Tuzla.

### **II ORGANI GRADA**

#### **Član 5.**

Organi Grada su gradsko vijeće i gradonačelnik/ca, koji svoju funkciju vrše u skladu sa Ustavom Bosne i Hercegovine, Ustavom Federacije Bosne i Hercegovine, Ustavom Tuzlanskog kantona, zakonom, Statutom i ovom Odlukom.

#### **1. Gradsko vijeće**

#### **Član 6.**

Gradsko Vijeće u okviru svojih nadležnosti:

- priprema i dvotrećinskom većinom glasova usvaja statut Grada;
- usvaja budžet i izvještaj o izvršenju budžeta Grada;
- donosi razvojne, prostorne i urbanističke planove i programe, te provedbene planove, uključujući i zoniranje;
- donosi propise o porezima, taksama, naknadama i doprinosima Grada u skladu sa Zakonom;
- donosi odluke o upravljanju i raspolaganju imovinom Grada;
- donosi odluke o zaduživanju;
- donosi programe uređenja građevinskog zemljišta;
- donosi plan korištenja javnih površina;
- donosi odluke o organizaciji mjesne samouprave i nazivima ulica, trgova i dijelova naseljenih mjesta;
- donosi odluke o udruživanju Grada u savez i druge oblike organiziranja;
- donosi odluke o proglašenju praznika Grada;
- donosi gradske odluke o nagradama i priznanjima;
- bira i razrješava predsjedavajućeg i zamjenika predsjedavajućeg Gradskog vijeća;
- donosi odluke o raspisivanju referenduma;
- razmatra godišnje izvještaje o provođenju gradske politike i aktivnostima gradonačelnika/ce;
- osniva preduzeća i ustanove za obavljanje poslova od interesa za Grad;
- donosi svoj poslovnik o radu;
- obavlja i druge poslove utvrđene zakonom i statutom.

Gradsko vijeće ima 31 (trideset i jednog vijećnika), od kojih se jedan vijećnik bira iz reda pripadnika nacionalnih manjina.

Članovi Gradskog vijeća odgovaraju za ustavnost i zakonitost akata, koje Gradsko vijeće donosi u okviru svoje nadležnosti

## **2.Gradonačelnik/ca**

### **Član 7.**

Izvršni organ grada je Gradonačelnik/ca.

Gradonačelnik/ca u okviru svoje nadležnosti:

- predstavlja i zastupa Grad;
- donosi akte iz svoje nadležnosti;
- izrađuje i podnosi gradskom vijeću na usvajanje nacrt i prijedlog budžeta, ekonomske planove, razvojne planove, investicione programe, prostorne i urbanističke planove i ostale planske i regulatorne dokumente, koji se odnose na korištenje i upravljenje zemljištem, uključujući i zoniranje i korištenje javnog zemljišta;
- predlaže odluke i druge opće akte Gradskom vijeću;
- provodi politiku Grada u skladu sa odlukama Gradskom vijeća, izvršava budžet Grada i osigurava primjenu odluka i drugih akata Gradskog vijeća;
- izvršava zakone i druge propise, čije je izvršenje povjereno Gradu;
- utvrđuje organizaciju gradskih službi za upravu u skladu sa zakonom;
- donosi pravilnik o unutrašnjoj organizaciji i sistematizaciji gradskih službi u skladu sa zakonom;

- realizira saradnju Grada sa općinama, drugim gradovima, međunarodnim i drugim organizacijama u skladu sa odlukama i zaključcima Gradskog vijeća i njegovih radnih tijela;
- podnosi izvještaj Gradskom vijeću o ostvarivanju politike Grada i izvještaj o svojim aktivnostima;

Gradonačelnik/ca odgovara za ustavnost i zakonitost akata, koje donosi, odnosno predlaže Gradskom vijeću.

### **Član 8.**

Međusobni odnosi Gradskog vijeća i Gradonačelnika/ce zasnivaju se na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje Grada.

## **III MJESNA SAMOUPRAVA**

### **Član 9.**

Mjesna samouprava u Gradu se ostvaruje u mjesnoj zajednici, kao obaveznom obliku mjesne samouprave koju Gradsko vijeće osniva svojom odlukom, te u gradskim četvrtima i drugim oblicima mjesne samouprave u skladu sa Zakonom i statutom Grada.

### **Član 10.**

Građani u mjesnim zajednicama, putem organa mjesne zajednice odlučuju o poslovima od značaja za rad mjesne zajednice, a naročito:

- pokreću i učestvuju u javnoj raspravi kod pripreme i donošenja urbanističkih planova na području mjesne zajednice; pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
- pokreću i učestvuju o raspravama o inicijativama i aktivnostima za razvoj privrede i društvenih djelatnosti;
- brinu se o zaštiti osoba, kojima je potrebna pomoć i u tu svrhu pokreću saradnju sa stručnim organima iz oblasti socijalne zaštite;
- staraju se o razvoju kulture i sporta i stvaraju uvjete za dostupnost ustanova i objekata kulture i sporta svim građanima, a pogotovu mladim;
- stvaraju uvjete i preduzimaju mjere za očuvanje prirodnih i radom ostvarenih vrijednosti čovjekove sredine;
- učestvuju u drugim poslovima utvrđenim statutom i pravilima mjesne zajednice, vodeći računa o vrsti i obimu potreba i raspoloživim sredstvima, kao i interesima građana u cjelini.

### **Član 11.**

Mjesna zajednica ima svojstvo pravnog lica u okviru prava i dužnosti utvrđenih statutom i odlukom o osnivanju.

### **Član 12.**

Poslovi iz djelokruga mjesne zajednice, organi mjesne zajednice, postupak izbora, organizacija i rad organa mjesne zajednice, način njihovog odlučivanja, te druga

pitanja od značaja za rad i funkcionisanje mjesne zajednice uređuju se statutom mjesne zajednice, koji mora biti u skladu sa Statutom Grada.

#### **IV GRADSKE SLUŽBE ZA UPRAVU, STRUČNE I DRUGE SLUŽBE**

##### **Član 13.**

Za obavljanje upravnih i drugih stručnih poslova iz samoupravnog djelokruga Grada, kao i poslova prenesenih Gradu od strane kantonalnih i federalnih vlasti osnivaju se gradske službe i upravne organizacije (u daljem tekstu: gradski organi uprave) u skladu sa zakonom.

Gradske organe uprave osniva Gradsko vijeće svojom odlukom, na prijedlog Gradonačelnika/ce, ako zakonom nije drugačije određeno.

##### **Član 14.**

Za obavljanje stručnih i drugih poslova za potrebe Gradskog vijeća, Gradonačelnika/ce i drugih gradskih službi za upravu, mogu se osnivati stručne, tehničke i druge službe, kao zajedničke ili samostalne službe.

Službe iz predhodnog stava ovog člana za potrebe Gradskog vijeća osniva Gradsko vijeće, a za potrebe Gradonačelnika/ce i gradskih službi za upravu osniva posebnom odlukom Gradonačelnik/ca, u skladu sa Zakonom.

##### **Član 15.**

Unutrašnja organizacija Gradskih organa uprave uređuje se Pravilnikom o unutrašnjoj organizaciji koji donosi Gradonačelnik/ca, u skladu sa zakonom.

Pravilnikom iz predhodnog stava ovog člana, uređuje se: organizacija organa uprave, organizacione jedinice i njihov djelokrug poslova, sistematizacija radnih mjesta, rukovođenje organima uprave, odgovornost za obavljanje poslova i zadataka, državni službenici sa posebnim ovlaštenjima te druga pitanja od značaja za unutrašnju organizaciju i rad Gradskih organa uprave.

##### **Član 16.**

Gradski organi uprave, u skladu sa zakonom i ovim Statutom, neposredno obavljaju sljedeće upravne i druge stručne poslove:

1. izvršavaju propise i druge opće akte iz samoupravnog djelokruga Grada,

- 2.izvršavaju zakone, druge propise i opće akte, prate stanje i provode utvrđenu politiku u oblastima iz njihove nadležnosti u skladu sa važećim Federalnim i Kantonalnim zakonima i drugim propisima,
- 3.rješavaju u upravnom postupku o pravima, obavezama i pravnim interesima građana i pravnih osoba iz samoupravnog djelokruga Grada,
- 4.obavljaju nadzor nad djelatnošću javnih poduzeća i ustanova koje obavljaju poslove na osnovu javnih ovlasti utvrđenih propisima Grada,
- 5.daju inicijative za rješavanje za rješavanje određenih pitanja iz samoupravnog djelokruga Grada,
- 6.pripremaju nacрте propisa i drugih općih akata iz svoje nadležnosti,
- 7.obavljaju i druge poslove određene ovim Statutom i Gradskim propisima.

Pored poslova iz prethodnog stava ovog člana, općinski organi uprave obavljaju i upravne i druge stručne poslove koji su federalnim zakonom odnosno zakonom Kantona, preneseni na općinu.

## **V PRIJELAZNE I ZAVRŠNE ODREDBE**

### **Član 17.**

Općinsko vijeće Tuzla i radna tijela Općinskog vijeća Tuzla, konstituisani nakon općinskih izbora 2012. godine, nastavljaju sa radom kao Gradsko vijeće i radna tijela Gradskog vijeća sa nadležnostima utvrđenim Statutom, Poslovníkom i ovom Odlukom sve do okončanja prvih narednih lokalnih izbora u skladu sa Zakonom.

Vijećnici iz predhodnog stava ovog člana će održati konstituirajuću sjednicu.

Na konstituirajućoj sjednici prvo će se pročitati imena vijećnika izabranih na općinskim izabranim na lokalnim izborima 2012. godine i/ili onih kojima je Centralna izborna komisija dodijelila mandat sukladno odredbama Izbornog zakona Bosne i Hercegovine do dana održavanja sjednice iz predhodnog stava ovog člana.

Na konstituirajućoj sjednici vijećnici će položiti svečanu izjavu slijedeće sadržine:  
“Svečano izjavljujem, da ću povjerenu dužnost vijećnika Gradskog vijeća Tuzla obavljati savjesno, pridržavati se Ustava Bosne i Hercegovine, Ustava Federacije Bosne i Hercegovine, Ustava Tuzlanskog kantona, zakona i Statuta i zalagati se za ljudska prava i slobode i da ću u svim prilikama štiti interese države Bosne i Hercegovine, Federacije Bosne i Hercegovine, Tuzlanskog kantona i Grada Tuzla i ravnopravnost naroda i građana.”

Tekst svečane izjave iz predhodnog stava ovog člana, primjenjivat će se u slučaju kada nakon prestanka mandata Centralna izborna komisija Bosne i Hercegovine, dodijeli mandate slijedećem vijećniku sa liste nakon lokalnih izbora 2012. godine.

### **Član 18.**

Na rad Gradskog vijeća i njegovih radnih tijela, primjenjivat će se odredbe važećeg Poslovníka Općinskog vijeća Tuzla i odredbe poslovníka radnih tijela, ako nisu u suprotnosti sa odredbama Zakona o uspostavljanju Grada Tuzle i odredbama ove Odluke.

Eventualna sporna pitanja, koja nisu uređena Poslovníkom iz predhodnog stava ovog člana regulisat će se zaključkom Gradskog vijeća na sjednici na kojoj se pojavi sporno pitanje.

#### **Član 19.**

Osobe izabrane ili imenovane od strane Općinskog vijeća, nastavljaju sa radom u Gradu Tuzli do isteka mandata na koji su izabrani ili imenovani, osim ukoliko ne podnesu ostavku ili budu razriješeni na način i po postupku propisanim Zakonom.

#### **Član 20.**

Načelnik općine Tuzla, neposredno izabran na općinskim izborima 2012. godine, nastavlja sa radom kao Gradonačelnik sa nadležnostima utvrđenim ovom Odlukom sve do okončanja prvih narednih neposrednih izbora za Gradonačelnika u skladu sa Zakonom.

#### **Član 21.**

Općinske službe za upravu, upravne organizacije i drugi općinski organi i službe (u daljem tekstu: općinski organi) nastavljaju sa radom, kao gradske službe za upravu, gradske upravne organizacije i drugi gradski organi i službe (u daljem tekstu: gradski organi) prema djelokrugu utvrđenom Odlukom o organizaciji općinske uprave („Sl.glasnik općine Tuzla“, broj 01/10 i 9/13 ) i drugim općinskim propisima, ukoliko se u skladu sa Zakonom, ne donese drugačija odluka.

Poslove, arhivu, dokumentaciju, kao i službenike i namještenike općinskih organa iz stava 1. ovog člana, preuzet će gradski organi u roku od 15 dana od dana stupanja na snagu ove Odluke.

#### **Član 22.**

Drugi općinski organi osnovani na temelju posebnog Zakona, nastavljaju sa radom kao gradski organi.

#### **Član 23.**

Općinska javna preduzeća i javne ustanove nastavljaju sa radom kao gradska javna preduzeća i javne ustanove.

Na temelju ove odluke izvršit će se promjena imena osnivača u sudskom registru.

#### **Član 24.**

Postojeći organi mjesnih zajednica nastavljaju sa radom do izbora novih organa mjesne zajednice na način i postupku utvrđenim statutom Grada i općim aktima mjesne zajednice.

#### **Član 25.**

Najkasnije u roku od dvanaest mjeseci od dana stupanja na snagu ove Odluke, Gradsko vijeće će donijeti Statut Grada.

Do donošenja Statuta Grada primjenjivat će se odredbe Statuta općine Tuzla („Sl.glasnik općine Tuzla“, broj 2/99, 9/00, 2/08 i 12/09 ), koje nisu u suprotnosti sa Zakonom o uspostavljanju Grada Tuzle („Službene novine Federacije Bosne i Hercegovine“, broj 80/14), Zakonom o principima lokalne samouprave u Federaciji Bosne i Hercegovine („Sl.novine Federacije BiH“, broj 49/06) (u daljem tekstu: Zakon o principima lokalne samouprave) i odredbama ove Odluke.

#### **Član 26.**

Do donošenja Gradskih propisa, ostaju na snazi odredbe općinski propisa, ukoliko nisu u suprotnosti sa odredbama Zakona o uspostavljanju Grada Tuzle i ove Odluke.

#### **Član 27.**

Najkasnije u roku od 30 dana od dana stupanja na snagu ove Odluke, izvršit će se registracija Grada Tuzle, kod nadležnih organa, promjena memoranduma, tabli i pečata, te preduzeti druge radnje neophodne za funkcionisanje Grada.

#### **Član 28.**

Ova Odluka se donosi dvotrećinskom većinom glasova od ukupnog broja izabranih viijećnika u Općinskom vijeću Tuzla.

Odluka iz predhodnog stava donosi se javnim glasanjem.

#### **Član 29.**

Danom stupanja na snagu ove Odluke prestaje primjena onih odredaba Odluke o o proglašenju Grada Tuzle („Službeni glasnik Općine Tuzla“, broj 01/07) , koje su u suprotnosti sa odredbama ove Odluke.

#### **Član 30.**

Ova Odluka stupa na snagu danom objavljivanja u „Službenom glasniku općine Tuzla“, a objavit će se i na web stranici Grada Tuzla.

**Bosna i Hercegovina**  
**Federacija Bosne i Hercegovine**  
**Tuzlanski kanton**  
**OPĆINA TUZLA**  
**Gradsko**  
**PREDSJEDAVALJUĆI**  
Broj:01-05-01-05-4875-2014  
Tuzla, 30. oktobar 2014. godine

**vijeće**

**Prof.Jozo Nišandžić**

## **Obrazloženje**

### **Pravni osnov za donošenje ove Odluke**

Pravni osnov za donošenje ove Odluke je član 9. Zakona o gradu Tuzla („Službene novine Federacije Bosne i Hercegovine“, 80/14), kojim je propisano slijedeće /citiramo/:

„Član 9“.

Privremena statutarna odluka

**Vijećnici izabrani na općinskim izborima za Općinu Tuzla održanim 2012. godine donijet će Privremenu statutarnu odluku Grada Tuzle u roku od dva mjeseca od dana stupanja na snagu ovog zakona, koja će važiti do donošenja Statuta Grada./završen citat/.**

### **Razlozi za donošenje ove Odluke**

Odredbom člana 5. stav 2. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06) je propisano da se grad, osim ustavom, uspostavlja federalnim zakonom, na osnovu sporazuma o udruživanju dvije ili više općina odnosno odluke općinskog vijeća općine koja ispunjava propisane kriterijume iz stava 1. ovog člana, a koja ima najmanje 30.000 stanovnika, odnosno u čijem gradskom središtu kao zokruženom urbanom području živi najmanje 10.000 stanovnika.



Također stavom 3. istog člana je propisano da grad u smislu ovog zakona predstavlja sjedište kantona i u slučaju neispunjavanja uvjeta iz stava 2. ovog zakona.

S obzirom da je Tuzla sjedište Tuzlanskog kantona, te imajući u vidu činjenicu da je nesporno da u Tuzli danas živi više oko 120.000 stanovnika, od čega preko 80.000 u užem gradskom jezgru i da ona predstavlja urbanu, infrastrukturnu cjelinu povezanu svakodnevnim potrebama stanovništva je Tuzla, pa samim time ispunjava kriterije iz člana 5. st. 2. i 3. Zakona o principima lokalne samouprave, Općinsko vijeće Tuzla je na svojoj sjednici održanoj dana 30.01.2007. godine, donijelo Odluku o proglašenju Grada Tuzla i Zaključak o pokretanju Inicijative za izradu Zakona o uspostavljanju Grada Tuzle.

Federalni Parlament je donio Zakon o gradu Tuzla na na 28. vanrednoj sjednici Predstavničkog doma Parlamenta Federacije BiH, i na vanrednoj sjednici Doma naroda Parlamenta Federacije BiH, održanoj 18.7.2014. godine.

Da bi Grad Tuzla otpočeo da funkcionira neophodno je donijeti privremenu Statutarnu odluku, kojem će se urediti funkcioniranje organa Grada Tuzle do donošenja Statuta grada.

Proglašenje Tuzle Gradom imalo je deklaratorni karakter, jer Tuzla to de facto i jeste, što proizilazi iz slijedećeg.

Tuzla je jedno od najstarijih naselja u Evropi, sa kontinuitetom življenja. Baštini najstariju proizvodnju soli u Evropi i ostatke najstarijih sojeničkih naselja u Evropi.

Arheološki dokazi o najstarijoj proizvodnji soli i ostacima najstarijeg sojeničkog naselja u Evropi, pronađeni su u centru sadašnje Tuzle i u Mjesnoj zajednici Gornja Tuzla. Pronađeni ostaci keramičkih posuda za isoljavanje ( proizvodnju soli iz slane vode), datiraju iz mlađeg kamenog doba tj. iz neolita. Iz istog perioda potiču i pronađeni ostaci sojenica.

Svoj zaključak i rezultate istraživanja o postojanju života u Tuzli od mlađeg neolita do danas, objavio je Vejsil Curčić u "Glasniku Zemaljskog muzeja Bosne i Hercegovine", broj XX iz 1908. godine. Do detaljnijih podataka o vrsti, veličini, bogatstvu i starosti naselja došlo se i 1955. godine, kada je u Rudarskoj ulici, današnjoj Džafer mahali otkopano dovoljno arheološkog materijala, koji je nedvosmisleno potvrdio da je u Tuzli postojalo veliko i bogato sojeničko naselje, jedno od najstarijih u Evropi. Arheološka istraživanja vršena od strane Zemaljskog muzeja u Sarajevu i Instituta za arheologiju Beča, nastavljena su 2002. godine. U toku 2007. i 2008. godine, prilikom kopanja temelja za gradnju zgrade "Barok", kao i prilikom gradnje Trga slobode, pronađene su velike količine ostataka keramičkih posuda za proizvodnju soli. Istraživanja u Beču, pokazala su da se radi o fragmentima posuda za isoljavanje koji datiraju iz mlađeg kamenog doba, tj. iz neolita.

Tuzla ima i posebnu geološku prošlost. Ispod grada nalaze se stotine miliona tona slanih stijena i slane vode, što je ostatak panonskog mora koje se sa ovih prostora povlačilo prije više od 10 miliona godina. Ime Tuzle je kroz sve vrijeme njenog postojanja, na raznim jezicima kartografa, putopisaca, historičara i osvajača, uvijek

bilo vezano za so. Rijeka Jala, koja protiče kroz Tuzlu nosi naziv prema grčkoj riječi Jalos, što znači so. Osim ove riječice, Tuzlom protiče i i rječica Solina, čije ime je vezano za so. Grad je kroz historiju nazivan Castron de Salenes, Salenes, Ad Salinas, Soli itd. sve do današnjeg imena koje potiče od turske riječi TUZ što znači so.

Dakle, ime Tuzle uvijek je bilo vezano za so a prema Lajošu Talociju i ime Bosne je vezano za ovu slanu zemlju koja se danas naziva Tuzlom. U svom djelu O ZNAČENJU IMENA BOSNA, korijen riječi bosna je ilirskog porijekla koja označava slanu posudu iz koje se isparavanjem dobija so ili slanu zemlju.

O kontinuitetu života u Tuzli, postoje mnogobrojni dokazi iz svih historijskih perioda. Za srednjevjekovni period, karakteristični ostaci su starobosanski stećci. Neke tuzlanske nekropole stećaka već su proglašene nacionalnim spomenicima i u toku je procedura njihovog uvrštavanja u svjetsku kulturnu baštinu i stavljanja pod zaštitu UNESCO-a. O osmanskom i austrougarskom periodu, zadržani su, sačuvani i obnovljeni mnogi nacionalni historijski i kulturni spomenici i dokumenti. Isto se odnosi i na period Kraljevine SHS, Kraljevine Jugoslavije i period SFRJ.

Historija Tuzle je prožeta tolerancijom. Tolerancija u ovom gradu uvijek je shvatana kozmopolitski. Simbol otvorenih vrata nalazi se na grbu grada i danas. Tuzla je danas najmultikulturalniji grad u BiH.

Tuzla je administrativni, privredni, kulturni, univerzitetski, medicinski, sportski centar i sjedište Tuzlanskog kantona.

Tuzla je privredni centar, na čijem području djeluje preko 2500 privrednih subjekata (pravnih osoba privrednih društava) i registrovano je oko 2600 obrtnika.

Privredu Tuzle čine razne privredne grane: industrija, rudarstvo, trgovine, turizam, usluge, ugostiteljstvo, poljoprivreda itd.

Tuzla je sjedište Državne regulatorne agencije za električnu energiju, što je i prirodno jer se dobar dio električne energije za potrebe naše zemlje razvija upravo u Tuzli.

Tuzla je Univerzitetski centar. Univerzitet u Tuzli je osnovan 1976. godine. Njegovom osnivanju je prethodilo konstituiranje Zajednice visokoškolskih i naučno-istraživačkih institucija u regionu Sjeveroistočne Bosne 1972. godine i Konzorcija za razvoj višeg i visokog obrazovanja i naučnoistraživačkog rada u Tuzli. Trenutno na Univerzitetu u Tuzli 15.000 studenata pohađa nastavu na postiplomskom studiju i 1500 studenata na postiplomskom studiju. U sklopu Tuzlanskog univerziteta trenutno ima 13 fakulteta sa mnoštvom studijskih odsjeka i oko 500 zaposlenih i vanjskih saradnika.

Tuzla je i medicinski centar sa tradicijom dugom preko 130 godina. U Tuzli egzistira Univerzitetsko-klinički centar u čijem sastavu se nalazi 16 klinika i dvije poliklinike sa pratećim službama i bolničkom ambulantom. Univerzitetski klinički centar Tuzla ima vrhunske medicinske stručnjake i pruža usluge ne samo stanovništvu Tuzle i Tuzlanskog kantona, već i šire, jer radi usluga ljudima, koji su zaposleni u ovoj

ustanovi dolaze građani, koji žive u drugim područjima Bosne i Hercegovine i izvan nje. Za Univerzitetsko-kliničkim centrom, nimalo ne zaostaje Javna ustanova Dom zdravlja "Dr. Mustafa Sehović" Tuzla, koja ima u svom sastavu 10 poliklinika u kojima radi 700 zaposlenika, među kojima preko 200 ljekara (doktora nauka, magistara, specijalista raznih struka i drugog visokostručnog medicinskog osoblja).

Kulturnu tradiciju Tuzle i okoline obilježili su brojni književnici, slikari, muzičari, pozorišni djelatnici, historičari. Od književnika posebno se izdvajaju Stjepan Matijević, Muhamed Hevai Uskufi, Matija Divković, Derviš Sušić, te jedan od najvećih bosanskohercegovačkih pisaca, Meša Selimović. Iz Tuzle potiču prvi školovani bosanskohercegovački slikari Đorđe Mihajlović i Adela Ber, te James Haim Pinto, jedan od vodećih američko-meksičkih muralista i Kristijan Kreković, slavni peruanski slikar, kao i najveći bosanskohercegovački slikar dvadesetog stoljeća, Ismet Mujezinović.

Međunarodna galerija portreta u Tuzli raspolaže djelima svih ovih umjetnika, a u okviru galerije djeluje i Međunarodni atelje «Ismet Mujezinović». Svoje djelovanje ova galerija upotpunjuje organizacijom Međunarodnog bijenala portreta «Interbifep».

Muzej Istočne Bosne posjeduje arheološku, etnološku, historijsku, biološku, numizmatičku i umjetničku zbirku, koje čuvaju tragove kontinuiteta od gotovo 7000 godina života u tuzlanskom kraju.

Muzej solarstva, koji postoji u okviru Fabrike soli, baštini foto-dokumentacionu građu i predmete koji svjedoče o historiji solarstva u Tuzli.

Današnje Narodno pozorište Tuzla je najstarije pozorište u Bosni i Hercegovini, a kulturnu scenu grada upotpunjuju Teatar Kabare, alternativni Draft teatar, Bosanski kulturni centar, Dom mladih, Kuća Plamena mira, Francuski kulturni centar, osnovna i srednja muzička škola, brojna amaterska kulturno-umjetnička društva i udruženja, te niz drugih kulturnih i naučnih institucija, među kojima posebno treba istaći Narodnu i univerzitetsku biblioteku «Derviš Susić» i Historijski arhiv Tuzlanskog kantona. Jedan od najznačajnijih kulturnih događaja u regionu su tuzlanski književni susreti «Cum grano salis», na kojima se, dodjeljuje književna nagrada «Meša Selimović», za najbolji roman objavljen u prethodnoj godini na književnom prostoru BiH, Hrvatske, Srbije i Crne Gore.

Tuzla svoju renesansu doživljava u prvoj deceniji 21.stoljeća. Zahvaljujući pravilnom načinu korištenja slane vode kao posebnog prirodnog naslijeđa, Tuzla danas ima jedina slana jezera u Evropi. Radi se o tri slana jezera i slanim slapovima koji se prostiru na prostoru od sedam hektara i čine kompleks kojeg je od 2003. godine do danas, posjetilo više od 2,5 miliona ljudi. Tuzlanske plaže, trgove i parkove, svake godine posjećuje sve više turista.

Tuzla je i sportski centar Tuzlanskog kantona, u kojoj se nalaze mnogobrojni značajni sportski objekti i djeluje više stotina klubova iz različitih sportskih grana.

Članom 4. Ustava Tuzlanskog kantona ("Službene novine Tuzlanskog kantona", br. 7/97, 3/99, 13/99 i 10/00) utvrđeno je da je Tuzla sjedište Tuzlanskog kantona.

Površina Tuzle iznosi 294 kvadratna kilometra, a čine je prema zvaničnim podacima Federalnog zavoda za statistiku slijedeća naselja i naseljena mjesta:

Brdani, Breske, Breze, Brgule, Bukinje, Cerik, Cviljevina, Čaklovići Donji, Čaklovići Gornji, Čanići, Dobrnja, Dokanj, Dragunja Donja, Dragunja Gornja, Gornja Tuzla, Grabovica Donja, Grabovica Gornja, Hudeč, Husino, Kiseljak, Kolimer, Kolovrat, Konjkovići, Kosci, Kovačevo selo, Kovačica, Krtolije, Kukovina, Lipnica, Lipnica Gornja, Lipnica Donja, Lipnica Srednja, Ljepunice, Ljubače, Marinkovići, Mihatovići, Milešići, Morančani, Mramor, Mramor novi, Obodnica Donja, Obodnica Gornja, Orašje, Osoje, Par selo Gornje, Pasci Donji, Pasci Gornji, Petrovice Donje, Petrovice Gornje, Plane, Pogorioci, Poljana, Potraš, Požarnica, Rapače, Rasovac, Simin han, Snoz, Svojtina, Ševar, Sići, Tetima, Tisovac, Tuzla, Vršani i Sički brod. Prema posljednjem zvaničnom popisu stanovništva iz 1991. godine, ukupan broj stanovnika u općini Tuzla iznosio je 131.618, od čega 83.770 stanovnika, koji žive u gradskom središtu kao zaokruženom urbanom području, dok u prigradskim mjestima živi 47.848 stanovnika.

Izvor: Statistički godišnjak iz 1992. godine

S druge strane, prema prvim preliminarnim rezultatima popisa stanovništva u 2013. godini, u Tuzli živi 120.441 stanovnik. Prema evidenciji Službe za opću upravu i društvene djelatnosti sa mjestom rođenja u Tuzli, ima ukupno 6.280 osoba starosti od 0-6 godina, 11.540 osoba koje pohađaju osnovnu školu (djeca od 7-14 godina) i 10.594 osobe, koje pohađaju srednju školu (osobe od 15-19 godina).

Prema podacima Ministarstva obrazovanja, nauke, kulture i sporta Tuzlanskog kantona, u Tuzli ima 27 osnovnih škola, od kojih su 23 redovne osnovne škole, dvije specijalne osnovne škole, jedna umjetnička škola, jedna međunarodna škola. Prema istom izvoru, u Tuzli egzistiraju tri gimnazije, devet mješovitih srednjih škola, dvije tehničke srednje škole, jedna srednja umjetnička škola i jedna srednja vjerska škola.

U posljednjih nekoliko godina, podstiče se razvoj malog i srednjeg biznisa. U svrhu poticaja malog i srednjeg biznisa, a naročito podsticanja zapošljavanja mladih i visokostručnih kadrova u Tuzli su osnovani Razvojno proizvodni centar Lipnica i BIT centar Tuzla (Biznis inovacioni Centar Tuzla).

Kako bi iskoristili prirodne pogodnosti u Tuzli, nastale kao rezultat postojanja slane vode, naporima Općinskog vijeća i općinskog načelnika, realiziran je projekat Panonskog jezera na lokalitetu Pinga, čime je nekada zapušten lokalitet, pretvoren u vrlo atraktivno kupalište u centru grada i stvoreni uvjeti za dalji razvoj turizma u Tuzli, koja je za zasluge u razvoju turizma osvojila zlatnu "Turističku ružu".

## **Obrazloženje pojedinih pravih rješenja**

Član 1. do 4. (Poglavlje I ) sadrži opšte odredbe (šta odluka reguliše, područje, činjenicu da Grad Tuzla ima svojstvo pravnog lica, te da preuzima obilježja Općine Tuzla).

Član 5. do 8. (Poglavlje II) sadrži uopštene odredbe o organima Grada Tuzle tj. Gradsko vijeće i Gradonačelnik/ca.

Član od 9. do 12. (Poglavlje III) sadrži odredbe o mjesnoj samoupravi u Gradu Tuzla.

Član 13. do 16. (Poglavlje IV) sadrži odredbe o gradskim službama za upravu.

Član 17. do 28. (poglavlje V) sadrži prijelazne i završne odredbe, koji su u skladu sa Zakonom o Gradu Tuzla.

**Obrađivač:**

**Stručna služba Vijeća**

**Tuzla, oktobar/listopad 2014. godine**